

Etiske retningslinjer for folkevalde og tilsette i Selje kommune

(Vedtekte av Selje kommunestyre den 29. april 2009, sak 033/09)

1. Føremål.

Desse retningslinjene gjeld for alle folkevalde og tilsette i Selje kommune. Føremålet med retningslinjene er å skapa betre medvit om haldningar og etiske verdiar, og dermed styrkja innbyggjarane sin tillit til administrasjon og politikk i Selje kommune.

2. Lojalitet

Selje kommune vil leggja stor vekt på lojalitet. Med lojalitet forstår ein at folkevalde og tilsette

- følgjer lover og føresegner m.m. som er fastsette av overordna sentrale styresmakter,
- følgjer reglar, retningslinjer og instruksar som Selje kommune har fastsett med heimel i sentrale lover og føresegner m.m.
- til ei kvar tid er merksam på og har for auga tilhøve som kan ha uheldige verknader i høve til kommunen sitt alminnelege omdøme eller tillit ute blant folk
- forvaltar kommunen sine interesser og verdiar på ein for samfunnet best mogeleg måte
- viser kollegaer, føresette og underordna respekt og tillit i omtale og handling

3. Informasjon

I all sakshandsaming og verksemd skal ein leggja vekt på å få fram fullstendig og korrekt og sakeleg informasjon som grunnlag for dei avgjerder som skal takast. Dette gjeld og munnleg informasjon gjeve i møte eller liknande.

Informasjon som ikkje er fortruleg, skal vere open og tilgjengeleg for alle.

Fortruleg informasjon må respekterast og ikkje misbrukast til personleg vinning eller til skade for andre.

4. Mynde

Mynde gjeve gjennom verv som folkevald, gjennom andre kommunale verv eller i kommunale arbeidstilhøve, skal nyttast til sitt føremål.

Mynde skal ikkje nyttast for å oppnå personlege føremoner, personleg vinning eller for å fremje personlege interesser.

Mynde skal nyttast med særleg varsemd overfor dei som har små ressursar og som vanskeleg kan hevda sine rettar. Mynde må ikkje nyttast til openberr ulikehandsaming.

5. Økonomiske og andre føremoner

I all saksførebuing og avgjerdsprosessar elles skal ein leggja vekt på å ha ei fri og uavhengig stilling. Økonomiske eller andre interesser og tilhøve som kan verka inn på, eller så tvil om, at sakshandsaminga eller avgjerder er saklege, skal ein unngå.

Ein må difor

- for seg sjølv eller andre ikkje ta imot gåver, provisjon, tenester eller andre ytingar som kan oppfattast som, eller av gjevaren meint som, påverknad i samband med tenesteyting/saksutgreiing eller liknande
- vere varsam med å ta imot invitasjonar til reiser o.l. (gratisreiser m.m.) utan på førehand å ha vurdert konsekvensane med overordna. Deltaking i eventuelle gratisreiser/seminar skal finne stad med utgangspunkt i eventuelt utbytte.

6. Interessekonflikt

Det er viktig å unngå situasjonar og aktivitetar som kan føre til konflikt mellom Selje kommune og personlege interesser.

Døme på slike mogelege interessekonfliktar er

- forretningssamband eller andre liknande bindingar med tidlegare arbeidsgjevar eller arbeidskollegaer
- løna ekstraarbeid som kan verka inn på eige arbeid i Selje kommune
- engasjement i interesseorganisasjonar eller –lag der engasjementet kan føre til at vedkomande kjem i ein konkurransesituasjon eller lojalitetskonflikt i høve til Selje kommune si verksemd
- personlege økonomiske interesser som kan føre til at vedkomande medarbeidar kjem i ein konkurransesituasjon eller lojalitetskonflikt i høve til Selje kommune si verksemd
- familiære eller andre sosiale samband.

Dersom ein har personlege interesser i ei sak eller på eit område der ein har fagleg ansvar eller mynde, skal ein ta dette opp med sin overordna.

7. Åtferd

Alle som representerer Selje kommune må vidareutvikle og arbeide for å styrkja den etiske standarden og åtferda i politikk og administrasjon.

Leiarar på alle nivå (politiske og administrative) har eit særleg ansvar for å leggja vekt på personleg integritet, vidareutvikling av etisk forsvarleg åtferd, og å gjera desse retningslinene kjende for politikarar og tilsette.

8. Teieplikt.

Alle politikarar må underteikne teiepliktskjema etter at dei er valde inn i formannskap, kommunestyre eller utval. Likeeins må alle tilsette i Selje kommune og underteikne teiepliktskjemaet.

Hovudregelen for forvaltningsmessig teieplikt er forvaltningslova § 13.

Brot på denne kan føre til straff etter straffelova §§ 121 og 144 eller etter reglane om uforstand i tenesta.